

Date – 06/12/2024

Time - 18:30 -18:40Hrs

- Larsap Dr. Hari Babu Kambhampati chuan Armed Forces Flag Day puala thuchah a sawina ah Mizoram sawrkarin sipai boral leh chhungte hnenah zangnadawmna nuai 12 chuang a pe tawh a ti.
- Chief Minister Pu Lalduhoma'n vawiina Chhingchhip Sainik School Annual Daya hmanpui na ah Mizoram leh India ramin lekhathiam, ram leh hnam tana mi tangkai a mamawh tih a sawi.
- Tourism Minister Pi Lalrinpui'n Tourism department hmalaknain tun thla ni 9 atanga ni 14 chhung International Paragliding Accuracy Championship leh Aero Sports Festival neih a nih tur thu a sawi.
- Prime Minister Narendra Modia chuan vawiin chawhnu khan New Delhi-a Bharat Mandapam-ah hmarchhak tana kut buatsaih Ashtalakhsmi mahotsav a hawng.

<><><>

GOVERNOR

Larsap Dr. Hari Babu Kambhampati chuan Financial year hmasa leh tun financial year kal mekah Mizoram sorkar chuan indona avanga sipai boral tate chhungte hnenah leh ramtuileiloa chhuakte hnenah zangnadawmna cheng 12,50,000 a pe tawh tih a sawi.

Larsap chuan kum tin December ni 7 ah India ram pumah Armed Forces Flag Day hman thin a nih thu sawiin Mizoram Legislative Assembly pakuanaa member Lt. Col. Clement Lalhmingthanga leh TBC Lalvenchhunga te chu Armed Forces mi leh sa an nih thu a sawi.

Larsap chuan Mizoram fa hrin, India ram tana an inpekna leh hnathawh that avanga huaisen lawmman leh chawimawina ngaihhlut hlawh tak tak dawngtute tarlangin Naib Subedar Jeremy Lalrinnunga, Guard Regiment, Gold Medalist, Commonwealth Games 2022 chu Vishist Seva Medal hlan a nih thu te, Naik Lalhmangaihsanga Chinzah, 1st Assam Regiment leh Major Laldingngheta, Madras Regiment-te chu ral hmaah huaisen taka an chet avangin Sena Medal (Gallantry) hlan an nih thute bakah Sepoy H. Lalrokima, 12 Assam Regiment chu ral hmaah huaisen taka a chet avangin Mention-in-Despatch hlan a ni bawh tih a sawi.

Governor chuan Financial year hmasa leh tun financial year kal mekah Ex-servicemen leh an chhungte mi 30 hnenah tanpuina 1,58,000 sem chhuah a nih thu a sawi bawh a ni.

<><><>

CM

Chief Minister Pu Lalduhoma'n vawiin khan Chhingchhip Sainik School Annual Day vawi 8-na hmanpuiin, Mizoram leh India ramin lekhathiam, ram leh hnam tana mi tangkai a mamawh tih a sawi.

Chief Minister chuan Mizoram sorkarin kum tin an school tan tanpuina tam tham tak a pe thin tih sawiin, chutianga phur taka sorkarin an school-a tanpui thin chhan chu

zirlai hlawhtling tam tak an neih theih nan a ni tih a sawi a, India rama Sainik School zinga Girls Cadet admission nei hmasa ber an ni chu lawmawm a tih thu a sawi bawk a ni.

Vawiina hun hmanah hian Chhingchhip Sainik School Principal Lt. Col. Kartik Sood chuan report pein tunah hian zirlai 388 an awm mek a ti a, an zinga 52 chu hmeichhia an ni a ti bawk.

Chief Minister hi School Office Conference Hall-ah school thuneitute nena inkawmna an nei nghal a, School tihchangtlun zelna tur hmachhawpte an sawiho a ni.

Chief Minister hi Bialtu MLA, Minister Pu PC Vanlalruata, Lt. Col. Clement Lalhmingthanga, MLA leh mi pawimawh dangte'n an tawiawm bawk a ni.

<><><>

TOURISM MINISTER

Tourism Minister Pi Lalrinpuii'n Tourism department hmalaknain tun thla ni 9 atanga ni 14 chhung International Paragliding Accuracy Championship leh Aero Sports Festival neih a nih tur thu a sawi.

He thu hi vawiina a pisa-a chanchinbu mite a kawmna ah sawiin Pi Lalrinpuii chuan Mizoram in Tourism huanga hmalakna ah khawvel mit hmuha an lan theih nan Paragliding a inelna kumina buatsaih a ni tur chu thil lawmawm tak a nih thu sawiin he festival a tel tur hian ram hrang hrang 12 - Saudi Arabia, Kosovo, Albania, South Korea, Spain, Singapore, Malaysia, Indonesia, Mongolia, Nepal, Kazakhstan leh ram chhung atangin Paraglider 79 an lo kalkhawm tur thu sawiin, ram dang mi lo kal tur an neih tam ber tum a nih thu a sawi a. He festival chhung hian mipui chhingtute tan Paragliding Joy ride a awm dawna, hot air ballon joy ride bakah Nghakuaichiah leh Air Rifle shooting te neih a ni dawn a ni.

Tourism department hmalaknain ni 16 atanga ni 21 chhungin Winter Festival, AR Lammual ah neih a ni dawn a. Festival neih chhung hian Ruihhlo lama inzirtirna neih tura ruahhman niin Winter Festival hi Aizawl mai ni lovin Reiek leh Hmuifang ah te neih a ni dawn a ni.

<><><>

HOME MINISTER

Home Minister Pu K.Sapdanga'n Champhai District a tlawhna ah Zote ram chhunga sawrkar hmunhma pahnih Industrial Training Institute leh Integrated Infrastructure Development Centre te chu a nihna tur ang tak leh tangkai zawka hman dan ngaihtuah a tul thu a sawi.

Pu K. Sapdanga chuan ITI chu thalai kut themthiam kawnga chher hriamna hmun anih theih nan a changtu LESDE Minister pawh a sawipui tawh thu leh tuna luah mektu raltlante chu Champhai Sub Headquarters YMA ruahmanna angin sawn chhuah tum an nih thu a sawi a, IIDC leh ITI chu sawrkarin tih phuisui a tum thu a sawi bawk.

Home Minister hi Champhai Zote khuain an khaw kum 125 tlin lawmna an kawtchhuahah chawimawina lung an phun sak a ni.

<><><>

EDUCATION MINISTER

School Education Minister Dr Vanlalhlana'n nimin khan Union Education Minister Dharmendra Pradhan chu a pisa-ah hmuin, a dept. chan hnuai Mizoram sorkar hmalakna hrang hrang leh mamawhte a sawipui.

School Education Minister chuan Mizorama National Education Policy (NEP) 2020 kalpui hmasa tur school thlan chhuah PM SHRI school neih belh a tul thu sawiin tunah hian school thlan chhuah 14,500 awmin Mizoram bikah school thlan chhuah 30 a awm mek tih a sawi.

Higher & Technical Education Minister ni bawk Dr Vanlalhlana chuan Mizoram Engineering College chungchang leh NIT, Lengpui campus-a state sorkarin harsatna a tawh sut kian mek a nih thu a thlen a, Samagra Shiksha zirtirtu hlawh chungchang bakah, Central atanga programme hmang tura tih tam lutuk tih tlem a tul thu a thlen bawk a ni.

<><><>

BUYER – SELLER MEET

Ram hrang hranga sumdawng lian intawhkhawmna International Buyer Seller Meet chu vawiin khan Baptist Centre, Falkland ah buatsaih a ni.

Mizoram Agricultural Marketing Board (MAMB) te chuan Agricultural and Processed Food Products Export Development Authority (APEDA) nena tang kawpin International Conclave cum Buyer Seller Meet Baptist Centre hi a buatsaih a, he hunah khuallian Commerce and Industries Minister Pu Rodinglana chuan Mizoram lo neitute chu an thlai thar te ram pawn atanga lo kal te ten tam thei ang ber an leisak theih nan duhsakna hlanin, nasa leh zuala an thlai tharte hralh chhuahna kawnga tan la sauh sauh turin a chah a ni.

BYTE..C&I MINISTER

International Conclave meet ah hian thlai thar pho chhuahna dawr engemaw zat siam niin Mizoram hmun hrang hrang atangin kuthnathawktu 100 vel an kalkhawm a, He Buyer Seller meet-ah hian ram hrang hrang - Russia, Oman, Azerbaijan, Nepal, Jordan, Bahrain, Ethiopia, Saudi Arabia, Singapore, Bhutan atangin mi 14 an tela, anni bakah India ram hmun hrang hrang atangin sumdawng lian mi 31 an rawn tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

PRASAR BHARTI

Union Minister of State for Information and Communication Dr.L.Murugan chuan Prasar Bharti-in Akashvani leh Doordarshan-te chu tunlai thiamna thar milin a ti changtlung zel tih a sawi. Rajya Sabha-a ziaka zawhna chhangin Pu Murugan-a chuan broadcasting sector lamah hmasawna awm turin policy pawh tunlai thiamna mila her rem zel a ni a ti a. Akashvani leh Doordarshan-ah te khawl changkang leh tunlai ber ber hman a ni a ti a. IIT-Kanpur nen MoU ziakin Direct to Mobile D2M broadcasting technology an isam a ti bawk..

<><><>

ASHTALAKHSMI MAHOTSAV

Prime Minister Narendra Modia chuan vawiin chawhnu khan New Delhi-a Bharat Mandapam-ah hmarchhak tana kut buatsaih Ashtalakshmi mahotsav a hawng. Ni thum awh tur he kutah hian hmarchhak mite hnam ziarang phochhuah a ni ang a, thiamthil hrang hrang leh hnam nunphungte an pholang dawn a ni.Hmarchhak state

pariatte kutchhuak, kutthemthiamte thilsiam bakah khualzin hipna remchang leh thilsiamchhuah danglam bikte tarlang a ni ang.

He festival-ah hian Rural Haat Bazaar siam niin hetah hian hmarchhak state atangin loneitu leh kutthemthiam mi 320 chuangte thilsiam tarlan a ni ang.

<><><>

NORTHEAST DEVELOPMENT

Union Minister of State for Home Affairs Nityanand Rai chuan sawrkarin hmarchhak hmasawna turin theihtawpin a thawk a ti. Vawiina chanchinbumite a kawmnaah he thu hi sawiin hmarchhaka cheng mipuite nunphung chu hmasawna hrang hrang avangin a inthlak danglam tawh a ti a. Hriselnate, inkalpawhna leh inbiakpawhnate, zirna leh railway sector ah te hmasawna a tam em em a ni a ti.

<><><>